

Վասպուրականի իշխանաց իշխաններին (իմա՝ թագաւորներին) ուղարկուող նամակներից յետոյ կայսրը նշում է երկրի կիսանկախ իշխանութիւններին (ընդամենը՝ 8 կամ 10 «արխոնտի») առանձին ուղարկուող նամակների մասին եւ Կոգովիտից, Տարօնից, Մոկսից, Անձեւացիքից, Սիւնիքից (Συνής) ու Վայոց ձորից (Βαϊτζώρ) յետոյ տալիս վերջին 2 անունները. «Խաչէնի (Χατζένης) իշխանին՝ Հայաստան, Սեւորդեաց, այսինքն Սեւ որդիներ կոչուող (τῶν Σερβοτιῶν, τῶν λεγομένων Μαύρα παιδία) երեք իշխաններին»²⁴:

Ժ. դ. երկրորդ կէսի արաբ մատենագիրը իբն Հաուքալի մօտ պահպանուել է 955 թ. դէյլեմցի Մարգուբան Սալարեանի կողմից Հայաստանի ու Հարեւան երկրների պետական կազմաւորումներից գանձուող Հարկերի ցանկը: Նրանում Շարլանի, Շաքքիի, Ահր-Վարդականի, Ներքին Արմինիայի (Անի), Վասպուրականի (Ալ-

Դայրանի), Վայոց ձորի (Ալ-Վայգուր) կողքին յիշատակուել են նաեւ Հայոց Արեւելից կողմանց երեք ապագայ թագաւորութիւնների տիրակալները. «Ռուբի տէր» (մեր կարծիքով՝ անկասկած, Սեւորդիք-Փառիստի՝ անճանաչելիօրէն աղճատուած յիշատակումն է) Սանհարիբ իբն Սաւազան (Սեւազա Իշխանանունի որդի Յովհաննէս Սենեքերիմը)՝ 300 հազար դիրհեմ հարկով, «Ջուրզի տէր» (անկասկած՝ Գորդուի աղճատուած յիշատակումն է) Վաշական իբն Մուսան՝ 200 հազար դիրհեմով եւ 150 հազար դիրհեմով՝ «Խաչէնի տէր» Սանհարիբը²⁵, այսինքն՝ Խաչէնի Սենեքերիմ իշխանը, որին յիշատակուել էր նաեւ Անանիա Մոկացիին²⁶: Արաբ մատենագիրը նրանց դեռ թագաւոր չի կոչուել, թէպէտ ուշագրաւ է, որ նա այդպէս է վարուել նաեւ Անիի, Վասպուրականի եւ Շաքքիի դէպքերում, ուր թագաւորական իշխանութեան գոյութիւնը որեւէ կասկած չի յարուցուել:

Փառիստի թագաւորութեան ստեղծման (Սեւազա Իշխանանունի որդու՝ Յովհաննէս Սենեքերիմի թագադրման) մասին պահպանուել է Մովսէս Դասխուրանցու «Պատմութիւն Աղուանից»-ի նախավերջին գլխի մանրամասն հաղորդումը²⁷: Այն թոյլ է տալիս այդ թագադրումը թուագրել երկի շարադրմանը նախորդած ժամանակով (մինչեւ 982 թ.), իսկ ըստ Ն. Աղոնցի հաշուարկների՝ դա աւելի հաւանական է վերագրել 966-978 թթ. ժամանակամիջոցին²⁸: Փառիստի յաջորդ թագաւորներին՝

24 Կոստանդին Ծիրանաձին, *Բիզանդական արքունիքի արարողութիւնների մասին*. Գիրք II, թարգմանութիւնը բնագրից, առաջաբանը եւ ծանօթագրութիւնները Հ. Բարթիկեանի (Օտար աղբիւրները Հայաստանի եւ հայերի մասին, Ե. Բիզանդական աղբիւրներ, Բ), Եր., 1970, էջ 151: Հմմտ. E. Honigmann, *Die Ostgrenze des byzantinischen Reiches*, Bruxelles, 1961, էջ 147-148. К. Н. Юзбашян, *Армянские государства эпохи Багратидов и Византия IX-XI вв.*, Москва, 1988, էջ 87: Տեղին նշեմք, որ, իբրեւ վարկած, հնարատր է մտածել, թէ հեղինակի կամ նրա մի ընթրիմակողի մօտ ինչ-որ շփոթութիւն է սպրդել, իսկ իրականում *Սեւ որդիներ՝ Սեւորդիք* եւ կոչուել կայսեր «Հայաստանեան թղթակիցներին» ոչ թէ վերջին իշխանութիւնները, այլ այդ՝ իրօք երեքից առաւելագոյնը երկուսը, այն է՝ Թ.-Ժ. դդ. առաջին կէսում հայկական աղբիւրներից շատ լաւ յայտնի *Տաուշ-Չորագետը* (իրօք՝ *Սեւորդեաց* կամ նաեւ *Ռոնեաց գաւառ* կոչուած) եւ *Գարդման-Փառիստը* (ընդ որում, վերջինս իր Սահակ Սեւադայ իշխանի ջանքերով տիրեց Սեւորդիքին, սակայն ի վերջոյ այն մտաւ Լոռու Կիրիկեանների տիրոջների մէջ): Այս վարկածի ընդունման դէպքում «երրորդ թղթակից» տակ հնարատր կը լինէր եւթադրել, անշուշտ, *Դիզակ-Գորդուի* իշխանին:

25 V. Minorsky, *Caucasica IV: II. The Caucasian Vassals of Marzubān*, - BSOAS, 1953, XV/3, էջ 519. Ա. Ն. Տէր-Ղեւոնդեան, *Հայաստանի բնահարկը արաբական ժամանակաշրջանում*, ԼՀԳ, 1969, թիւ 2, էջ 58-59:
 26 Տեառն Անանիայի Հայոց կաթողիկոսի Յաղագս ապստամբութեան տանն Աղուանից, էջ 144: Տե՛ս վերելում, ծնթ. 21:
 27 ՊԱ, գիրք Գ, ԻԲ, էջ 341: Հմմտ. А. А. Акопян, *Албания-Алуанк*, էջ 213-214:
 28 Ն. Աղոնց, *Պատմական ուսումնասիրութիւններ*, էջ 138-140: